

2 Jo-Korintho

JANDIKO: Jaote Paulo

KAR NDIKO: Efeso

KINDE NDIKO: 57 E YIK RUOTH (AD)

Gik Manie Iye

Barup Paulo mokuongo ne kanisa man Korintho ne ok otieko chandruok duto. Kata ne okonyo weche moko kuomgi to moko mang'eny nepod odong' manyaka ne otim. Mokuongo nochuno Paulo mondo olernegi kuom ng'ama nomiye teko mar yalo. Weche mang'eny mag miriambo nosewach kuome maok wang'eyo gimomiyo, kuom mano nochuno Paulo mondo ondiki kuom teko mane en-go kaka Jaote. Bende otemo puonjo kuom weche moko motegno to moloyo to kaka ginyalo konyo jowadgi modhier ma Jo-Kristo man kuonde mamoko.

THORRO

Loch kuom jasigu nie baruwani aa chakruokne nyaka gikone. En barup osiepe, mane ondiki gi jal mohero joge, kata obedo nine gisekethone kamano. Ka Paulo nyiso kit ngi-mane, kod kit Injili mar ja-Kristo to inyalo neno ng'wono mar Nyasaye katiyo kokelo ber kuom rach.

Satan nigi teko kendo otemo mar ketho tich Nyasaye to Nyasaye pod nigi teko moloye kendo osiro ji duto mogene.

WECHE MOCHAN KAE GIN:

1. Mos mar Paulo 1:1-11
2. Weche moko kuom timbe Paulo 1:12-2:13
3. Weche moko kuom tich ja-Kriskto 2:14-6:10
4. Weche moko kuom Paulo 6:11-17:16
5. Golo chiwo ne joma odhier man Jerusalem 8:1-9:15
6. Paulo osiro luongne mar jaote 10:1-13:10
7. Weche mogik 13:11-14

1 An Paulo, jaote mar Kristo Yesu kuom dwaro mar Nyasaye; kod owadwa Timotheo,

Ne kanisa mar Nyasaye man Korintho, kaachiel gi jomaler duto man Akaya:

²Mad Ng'wono gi kuwe moa kuom Nyasaye Wuonwa gi Ruoth Yesu Kristo obed kodu.

Nyasach Hoch Duto

³Pak ni Nyasaye ma Wuon Ruodhwa Yesu Kristo, kendo ma Wuon ng'wono kendo Nyasach Loch duto, ⁴en moloyowa

e chandruok duto mamakowa, mondo wabed gi nyalo mar hoyo jomamoko manie chandruok, ka wahoyogi gi hoch ma Nyasaye osehooyago wan wawegi.

⁵Nikech, mana kaka wan e achiel gi Kristo e chandruokge duto mane oneno, e kaka wan kode e hoch mochiwo. ⁶Ka waneno malit, to mano timorenwa nikech hoch kod warruok maru; to ka wayudo hoch, to en mondo un bende uyud hoch. Hoch makamano miyou kinda kod dhil e chandruok ma wan bende wayudo. ⁷Emomiyo geno ma wan go kuomu ok yiengni,

nikech wang'eyo ni kaka un kodwa e achiel e chandruok mwaneno, e kaka un e achiel bende e hoch machal gi mano mihoyowago.

⁸Ok wadwar mondo ubed ka ukia, Jowete, kaka ne waneno masiche mapek e piny Asia. Ne oyie kuomwa masiche madongo kendo mapek moingowa ting'o mi ne wajok gi bedo mangima. ⁹Chutho, ne wawinjo e chunywa kagima nosen-g'adnwa buch tho. To magi notimorenwa mondo waket genowa kuom Nyasaye ma chiero joma otho, to ok kuomwa wawegi. ¹⁰En mane oseresowa e dho tho malich kamano kendo obiro resowa. Kuome waseketoe genowa ni pod obiro resowa, ¹¹ka umedo konyowa gi lemo maru. Mano nomi ji mang'eny nodwokone Nyasaye erokamano kuom gweh momiyowa, kodwoko lamo mar ji mang'e-ny.

Paulo Oloko Chenro Mage

¹²Koro ma e sunga marwa: chunywa miyowa ratiro ni wasedak e pinyini, to molooyo e winjuok marwa kodu, ka waluoro Nyasaye kendo ka wawuotho e ler mar adier. Ok wasedak kamano nikech waluwo rieko mar pinyini, to nikech ng'wono mar Nyasaye. ¹³Nikech ok wandiknu gik matek maok unyal somo mi uwinj tiendgi. Omiyo ageno ni, ¹⁴mana kaka koro useng'eyowa moromo, e kaka ubiro medo ng'eyowa chuth, mondo uchop e okang' munyalo sungoru nikech wan, mana kaka wan bende wabiro sun-gore nikech un e odiechieng Ruoth Yesu.

¹⁵Nikech ne an-gi ratiro kuom wachni, ne achano mar limou mokwongo mondo ne uyudi gweth manyadiriyi. ¹⁶Ne achano mondo alimu kane anie wuodha adhi Makedonia, kendo ne achano rawo iru ka aa kuno, mondo ayud kony kuomu e wuodha madhi Judea. ¹⁷Kane achano kamano, uparo nine atimo kamano ka atugo? Koso uparo ni alosa chenroga ka japiny, ma anyalo kiko wach ka ayie ni, "Eee, Eee" kendo achako akwer ni "Ooyo,

Ooyo?"

¹⁸Kaka Nyasachwa en jaadiera, wach ma wesebedo ka wawacho kodu ok en "Eee" gi "Ooyo." ¹⁹Nikech Yesu Kristo, Wuod Nyasaye, mane wayalonu wachne, wan gi Sila gi Timotheo, ne ok en "ee" gi "ooyo", to osebedo "ee" kinde duto. ²⁰Nikech singruok ma Nyasaye osetimo kodwa duto kar rombgi gin "Ee kuom Kristo." Mano emomiyo kwalamo e nying Kristo to wagoyo ni "Amin", kwamiyo Nyasaye duong'. ²¹To Nyasaye owuon ema osemiyo un kod wan wachung' motegno kuom Kristo. En ema osewirowa, ²²mi oketo kido kuomwa manyiso ni wan joge bende oseketo Roho mare e chunywa kaka singo mar gima biro.

²³Aluongo Nyasaye mondo obed janeno mara, ka anyisou ni ne ok aduogo Korintho mana mondo kik akelnu kuyo. ²⁴Ok wawach kamano nikech watemo bedo gi teko kuom yie maru, to watiyo kodu kaachiel mondo uchung' motegno e yie maru ka umor.

2 Omiyo ne ang'ado e pacha kuom wachni, ni ok nachak alimu kendo ka limbena dikelnu kuyo. ²Nikech ka an ema amiyo ubedo mokuyo, to en ng'awa ma dimiya mor, ka ok mana un ma amiyou chuny lit? ³Mano emomiyo ne andikonu kamano, mondo kane abiro iru to kik umiya kuyo un monego umiya mor. Nikech ang'eyo malong'o chuth ni ka amor to eka un duto bende umor. ⁴Ne andikonu ka chunya chandore kendo lit; kendo pi wang'a ne chwer mang'eny, nikech ne ok adwar mondo ami ubed mokuyo, to ne adwaro mondo ung'e kaka aherou, un duto, gi hera matut.

Weyo Ni Jaricho Richone

⁵Ponono ng'ato osekelo chuny lit, an ok ema osekelona chuny litno, to osekele mana ni un, ka ok adwar jimbo wachno. ⁶To kum ma osemi ng'atni gi ji mathoth kuomu koro oromo. ⁷Sani koro nyaka uwene richone kendo uhoye, mondo kik

kuyo mare dhire nono. ⁸Omiyo akwayou mondo unyise ni koro eka uhere molooyo. ⁹Gimomiyo ne andikonu ne en mondo atemu ane kendo ang'e ka bende un joma nigi luor e gik moko duto. ¹⁰Ng'ato ang'ata muweyone richone an bende aweyone. Nikech ka aweyone ng'ato richone (ka dipo an bende onego awene ng'ato e wach moro amora) to atimo kamano kuom Kristo, nikech un, ¹¹mondo kik satan lowa gi riekone, nikech wang'eyo chenro mage.

Jotich Mag Singruok Manyien

¹²Kane abiro Troa mondo ayal Injili mar Kristo kendo nayudo ka Ruoth noseyawona dhoot, ¹³to ne pod aonge gi kuwe e chunya nikech ne ok ayudo owadwa Tito kuno. Omiyo ne agoyo oriti ne jogo, mi adhi Makedonia.

¹⁴To erokamano ni Nyasaye, ma kinde duto telonwa kaka joma oselochu kuom Kristo, kendo ma konyore kodwa kuom keyo tik mamit mar ng'eyo Kristo. ¹⁵Nikech Nyasaye tiyo kodwa kaka tik mamit mar Kristo e kind joma iwaro kod joma lal. ¹⁶Ni joma lal wadum tik tho to ni joma iwaro to wadum negi tik ngima. Koro en ng'a mowinjore gi tich machal kamano? ¹⁷Nikech wan ok wachal gi ji mathoth mamoko, magajo wach Nyasaye mondo giyudie ohala. Wanto wan joma Nyasaye oseoro kendo wawacho adiera e nyime kuom Kristo.

3 Dibed ni wachako pwoyorenu kendo? Koso wachako dware barupe mag pwoch moa kuomu, kata mwabirogo iru, kaka jomoko ohero timo? ²Un e barupe-wa, mondiki e chunywa, kendo ma ji duto ong'eyo, kendo somo. ³Unyiso ni un barupe moa kuom Kristo, matijwa okelo, ma ok ondiki gi wino, to mondiki gi Roho Maler mar Nyasaye mangima, bende ok ma ondiki e kite mopa, to mondiki e chun-je mag dhano.

⁴Mano e chir ma wan go kuom Nyasaye nikech Kristo. ⁵Ok ni wan-gi nyalo moro kuomwa wawegi mar tiyo

tijni, to nyalowa aa kuom Nyasaye. ⁶Osemiyowa nyalo mar bedo jotich mag singruok manyien, ma ok otenore kuom chik mondiki, to motenore kuom chuny, nikech chik mondiki neko, to Roho chiwo ngima.

Duong' Mar Singruok Manyien

⁷Koro ka tich mane okelo tho, mane ondike kite mopa, mane obiro gi duong' mondo omi jo-Israel kik ng'i wang' Musa tir nikech duong'ne kata obedo ni duong'no nedhi ka rumo, ⁸to donge dibed ni tich mar Roho biro bedo gi duong' mang'ongo molooyo? ⁹Ka tich ma ing'adonego ji bura nigi duong' kamano, to tich, ma keto ji kare, nyaka bed gi duong' molooyo! ¹⁰Nikech gimane nigi duong' kindecha koro onge gi duong' minyalo pimo gi mano maduong' molooyo. ¹¹To ka mano marumo nobiro gi duong' kamano to kare koro mano masiko nyaka bed gi duong' mang'ongo molooyo!

¹²Emomiyo ka koro wan-gi geno machal kama, wawuoyo gi chir mathoth. ¹³Ok wachal gi Musa mane umo wang'e mondo kik jo-Israel ne ka ler manie pat wang'e rumo. ¹⁴To pachgi nosiko kodinore, nikech nyaka koroni raumno pod oumo chunjegi ka isomo singrouk machon. Pod ok ogole nikech raumno igolo mana ka ng'ato ni kuom Kristo. ¹⁵Kata mana sani kisomo chik Musa to raum geng'o chunygi. ¹⁶To saa asaya ma ng'ato olokore odhi ir Ruoth to raumno igolo oko. ¹⁷Koro Ruoth e Rohonogo; kendo kama Roho mar Ruoth nitie, thuolo nitie. ¹⁸Koro wan duto mwanyiso picha mar duong' Ruoth, ka ok waumo wenge-wa, imedo lokowa mondo wamed bedo machal lode, ka duong' mawan-go medo medore ma wuok kuom Ruoth, ma en Roho.

Mwandu Manie Agulini Mag Lowo.

4 Emomiyo, ka koro Nyasaye oseke-chowa momiyowa tijni mondo watim, chunywa ok nyosre. ²Wasekwedo

timbe maling'ling' mag miriambo ma kuodo wich, ok wakonyre gi wuond, bende ok wagaj wach Nyasaye, to wawuotho e ler mar adiera kendo wachiwore ni ji duto, mondo chunygi orwakwa e nyim Nyasaye. ³Nikech ka poni Injili mwayalo ogeng'ore, to ogeng'ore mana ni joma lal. ⁴Joma kamago otamore yie nikech nyasach pinyini osedino pachgi mondo kik gine ler mar Injili manyiso duong' mar Kristo, ma en e kido mar Nyasaye. ⁵Nikech ok wayal wach kuomwa wawegi, to wayalo Yesu Kristo kaka Ruoth, to wan wawegi wan jotichu kuom Yesu. ⁶Nikech Nyasaye mane owacho ni, "Ler mondo orieny koa e mudho" ema osemiyo lerne omenyo chunywa, momiyowa ler mar ng'eyo duong' Nyasaye mineno e lenda wang' Yesu Kristo.

⁷To mwandu mawan-goni wating'o e agulni mag lowo, mondo oyangre ni teko maduong' mawan-goni oa kuom Nyasaye, to ok oa kuomwa wawegi. ⁸Pile idiyowa matek e yore duto, to ok dinwa; wadhier nono, to ok wajogi; ⁹isandowa, to ok jwang'wa; igoyowa piny, to ok tiekwa.

¹⁰Kinde duto wawuotho ka wating'o tho mar Yesu e ringrewa, mondo eka ngima mar Yesu onere e ringrewa. ¹¹Nikech wan mwangima ochomwa gi tho kinde duto nikech wach Yesu, mondo ngima mar Yesu onere e ringrewa matho. ¹²Omiyo koro wan tho tiyo kuomwa, to un, ngima tiyo kuomu.

¹³Ondik ni: "Ne ayie emomiyo ne awuoyo". Gi chuny mar yie machalre, wan bende wayie kendo wawuoyo, ¹⁴nikech wang'eyo ni Jal mane ochiero Ruoth Yesu oa kuom joma otho biro chierowa wan bende gi Yesu, kendo obiro kelowa kaachiel gi un, e nyime. ¹⁵Magi duto timore mondo okonyu, mondo kaka ng'wono medo chopo ni ji mang'eny moloyo, ji odwok erokamano ni Nyasaye, mondo Nyasaye oyud duong'.

¹⁶Emomiyo chunywa ok nyosre. Kata obedo ni ringrewa maoko rumo kamano, to chunywa iloko manyien odiechieng'

kodiechieng'. ¹⁷Nikech chandruok mwayudo matindo kendo makadho piyo biro kelonwa duong' mosiko kendo moloyo chandruokgo duto. ¹⁸Omiyo ok wachom wengewa kuom gik mineno, to kuom gik maok ne. Nikech gik mineno gi wang' rumo, to gik maok ne siko nyaka chieng'.

Kar Dakwa Manie Polo

5 Nikech wang'eyo ni ka kiru mwadakieni okethi, to wan gi ot ma Nyasaye osegeronwa e polo, ma en ot mosiko, ma lwet dhano ok ogero. ²Kapod wan e kiruni to wachur ka wagombo mondo orwakwa gi odwa mar polo ³nikech ka waserwakore kode, to ok bi yudwa duk. ⁴Nikech kapod wadak e kiruni, to wachur gi pek modiyowa, to mano ok onyiso ni wadwaro weyo ringruok mawan-goni, to wagombo rwakore gi ringruok manyien mar polo, mondo gima ok tho omwonyo mano matho. ⁵Nyasaye ema oseikonwa chenro machalo kama, kendo osemiyo Roho kaka singo, ma singo gima biro.

⁶Kuom mano, wan-gi chir pile, kendo wang'eyo ni ka pod wadak e ringruokni to wan mabor gi Ruoth. ⁷Wadak kuom yie to ok kuom gik mwaneno. ⁸Wawacho ni wan-gi chir kendo dwaher moloyo weyo dak e ringruokni mondo wadag kanyachiel gi Ruoth. ⁹Omiyo thorro marwa maduong' en mondo watim dwarone, bed ni pod wadak e ringruokni kata ka wase aa. ¹⁰Nikech nyaka wan duto wabi wachung' e nyim kom bura mar Kristo, mondo ng'ato ka ng'ato oyud gima owinjore gi gik mane otimo kapod en ringruok kata gin gik mabeyo, kata maricho.

Tich Mar Kelo Winjruok

¹¹Nikech koro wang'eyo gima luoro Ruoth en, watemo ywayo ji. Wan to Nyasaye ong'eyowa malong'o, kendo ageno ni un bende ung'eyowa malong'o chuth e chunyu maiye. ¹²Ok watem

pwoyorenu kendo, to wamiyou gima unyalo sungorugo kuomwa, mondo uyud gima unyalo dwokogo joma sungore nikech timbegi maoko mineno to ok nikech gima ni e chunyi. ¹³Kapo mano nyalo miyo wachal joneko, to obedo nikech Nyasaye; to ka pachwa ni kare, to en kamano nikech un. ¹⁴Nikech hera mar Kristo chunowa mondo watim gik mwatimo, nikech wan-gi ratiro ni ng'ato achiel notho ne ji duto; omiyo ji duto notho. ¹⁵To notho ni ji duto mondo joma ngima koro kik bed mangima mana ni gin giwengi, to mondo gibed mangima ni Jal ma notho mochako ochier nikech gin.

¹⁶Omiyo chakre sani koro ok wang'e ng'ato e yo mapiny ng'eyogo ji. Kata obedo ni kinde moko ne wang'eyo Kristo e yo makamano, tinde ok watim kamano kendo. ¹⁷Emomiyo ka ng'ato ni kuom Kristo to en chwech manyien; gik machon osekadho, neuru, gik manyien osehopo! ¹⁸Magi duto oa kuom Nyasaye, mane ogolo sigu mane nie kindwa kode kotimowa osiepene kuom Kristo, kendo omiyowa tich mar loko wasike osiepene: ¹⁹tiende ni Nyasaye ne timo winjruok gi piny kuom Kristo, ka ok okwano richo ji e wigi. To wan ema osemiyowa wach manyiso ji kaka digibed e winjruok gi Nyasaye. ²⁰Kuom mano, wan e jombetre mag Kristo, wachalo kagima Nyasaye konyore kodwa kuom ywayo ji ire. Wahombou ka wachung' kar Kristo, mondo uwinjru kod Nyasaye. ²¹Nyasaye noketo Jal mane onge richo obedo richo mondo kuome wabed joma kare mag Nyasaye.

6 Kaka Jotich kaachiel gi Nyasaye wakiwayou mondo kik ukaw ng'wono Nyasaye museyudo ka gir tugo. ²Nikech owachoni,

"Ne awinji e saa mowinjore; chutho ne akonyi e odiechieng' mar warruok. Awachonu ni, ma e saa mar Nyasaye mowinjore, ma e odiechieng' warruok.

Pek Ma Paulo Oyudo

³Ok wadwar ni ng'ato oyud ketho moro amora e tichwa, omiyo watemo mondo kik wachwany ng'ato. ⁴Wan kaka jotich Nyasaye wanyisore e yore mang'eny kaka: dhil maduong', sandruok, chandruok kod e masiche; ⁵e goch, e tuech, e koko, e tich matek, e fuwo nindo otieno mang'eny, gi riyo kech; ⁶kuom ritruok maler, kuom ng'eyo, kuom kinda, kuom ng'wono, kuom Roho Maler gi hera mar adier; ⁷kuom wacho adier, kendo kuom teko mar Nyasaye. Watimo gigi duto ka wating'o gilweny mag ngima makare e lwetwa korachwich gi koracham; ⁸ka imiyowa duong' kendo ichayowa; iketho nyingwa kendo ipwoyowa, joma odimbore to ikawowa ka joma ketore; ⁹joma ong'ere to wachal joma ok ong'e, kendo wachalo joma chiegni tho, to pod ineno mana ka wangima angima, igoyowa to ok negwa; ¹⁰wakuyo, to wasiko wamor amora, wadhier, to wamiyo ji mathoth doko jo mwandu, wananore ka gima waonge gimoro, to kare wan ema wan gi gik moko duto tee.

¹¹Yaye jo Korintho, wawuoyonu ka wan kodu thuolo kendo ka chunyiwa oyaworenu malach. ¹²Wan ok wapandonu herawa, to un ema upandonwa. ¹³Ka anyalo wuoyonu kaka nyithinda, to awachonu ni, un bende yawnwauru chunyu malach!

Kik Uriwru Gi Jopiny

¹⁴"Kik uriwru gi jopiny. Nimar en winjruok mane ma ber gi rach dibedgo e achiel? Koso ere kaka ler gi mudho didag kanyachiel? ¹⁵Winjruok mane ma Kristo nigo gi Obel? En ang'o madiriw ng'ama oyie gi ng'ama pok oyie? ¹⁶Winjruok mane ma Hekalu mar Nyasaye nigo gi nyiseche manono? Nikech wan e Hekalu mar Nyasaye mangima! Mana kaka Nyasaye owuon osehacho ni: "Abiro dak e igi kendo abiro wuotho e diergi kendo abiro bedo Nyasachgi to ginibed joga."

¹⁷Emomiyo auru kuomgi kendo pogreuru kodgi, Ruoth owacho. Kik umul gima ochido, eka narwaku."

¹⁸Anabed Wuonu to unubed yawuota gi nyiga, Ruoth Manyalo Gik Moko Duto owacho."

7 Koro osiepena mageno kaka wan-gi singruokgi, wapwodhreuru kuom gik moko duto machido ringruok gi chuny mondo wadok jomaler chuth nikech waluoro Nyasaye.

Mor Ma Paulo Nigo

²Yawnwauru chunyu. Pok watimo ni ng'ato marach kendo pok waketho ne ng'ato, bende pok wamayo ng'ato gire kwakonyore gi wuond. ³Ok awach wehegi mondo ang'adnu bura kaka joketho, nikech, kaka nasewachonu motelo, wagenou gi genruok maduong' e chunywa, kendo waikore tho kodu kendo bedo mangima kodu. ⁴An gi chir maduong' kuomu; asungora matek nikech un! Kaparou to chunya yudo jip mathoth kendo e chandruokwa duto, chunya opong' gi mor motiak.

⁵Nikech, kata kane wabiro Makedonia, ringrewa ne ok oyweyo mak oneno sand mak rum; dhawo nolworowa gi oko to chunywa nopong' gi luoro. ⁶To Nyasaye, majiwo joma chunygi onyosore, nojiwowa kane Tito obiro irwa, ⁷to ok birone kende ema nojiwowa, to hoch mane uhoyego bende nojiwowa. Nonyisowa kaka un-gi siso mar nena, kendo kaka chunyu otur, kendo kaka uikoru mar chwaka ma mago duto nomiya amor molojo.

⁸Nikech kata ka barupa mane andikonu nomiyo ukuyo, to ok anyal timonu mos. Kata kamano ne atimo mos, nikech aneno ni barupano nomiyu chuny lit, to mana matin nono. ⁹To koro amor, ok nikech ne uyudo chuny lit, to nikech chuny litno nokelono lokruok. Nikech nubedo gi chuny lit mar Nyasaye, kendo ne ok uhinyoru e yo moro amora nikech wan.

¹⁰Nikech kuyo mar Nyasaye kelo lokruok, makelo warruok kendo ok mi waywang ang'e, to kuyo mar piny kelo tho. ¹¹Neuru gima kit kuyo mar Nyasaye osenyago e ngimau: osemiyo udoko joma otang' mak badhre ni loso weche manie dieru. Koro usin gi timbe mamono; uluoro donjo e richo kendo; uhera kendo ugombo mondo amed konyou e wachno kendo uikoru kumo joma oketho. Koro usepwodhoru udoko maler e wach mane otimore e dieru. ¹²Omiyo kata kane andikonu to ne ok en nikech wach ng'at mane otimo marach, kata nikech joma notimngi marach, to ne andikonu mondo, e nyim Nyasaye, uneye kaka ugenowa. ¹³Magi duto osejiwowa.

Kaachiel gi jip mane wayudo koa kuomwa wawegi, molojo to ne wamor kane waneno mor mane Tito nigo, nikech dhial mane umiye. ¹⁴Noyudo asesungorene nikech un, kendo koro ok usekuodo wiya. To mana gik moko duto mwasebedo ka wawachonu gin adiera e kaka sunga mane wasungorego ni Tito kuomu bende osedoko gima adier. ¹⁵Omiyo koro hera moherougo osemadore molojo, koparo kaka un duto ne uwinjo wachwa, kendo kaka ne urwake gi luoro kod kibaji. ¹⁶Amor sidang' ni anyalo bedo gi geno kuomu chuth.

Jip Kuom Chiwo

8 To koro Jowetewa wadwaro ni ung'e gima ng'wono mar Nyasaye osetimo ni kanise man Makedonia. ²Kata obedo ni giseneno malit mokalo pimo, kendo gidhier ahinya kamano, to mago osemiyo gimedo bedo mamor molojo, kendo chiwogi mar ng'wono osemadore mokalo pimo. ³Anyisou adier ni ne gichiwo mar chiwo kaka ginyalo, kendo molojo nyalogi. Ka onge ng'ama ochunogi, ⁴ne gisayowa ka giramo ni gin bende nyaka gichiwo makorgi kuom konyo jo Nyasaye. ⁵Ne gichiwo mathoth molojo kaka ne waparo! Mokuongo ne gichiwo ni Ruoth; eka bang'e gichiwo ni wan bende, kaka

Nyasaye dwaro. ⁶Omiyo ne wajiwo Tito, kaka en ema nochako tijni e dieru, mondo odhi kode nyime nyaka chop otiek tij ng'wonono. ⁷To ka umewo mokalo e gik moko duto ma un-go, kaka: yie maru, gi losou, gi ng'eyou, gi ikruok maru mar konyo, kod hera muherowago wadwaro ni tij ng'wononi mar chiwo bende utimie maber moloyo.

⁸Ok amiu chik kuom wachni, to anyisou kaka joma oikore konyo tich Nyasaye mondo atemgo herau ka bende en hera madier. ⁹Nikech ung'eyo ng'wono mar Ruodhwa Yesu Kristo kaka chal, ni kata obedo ni ne en gi mwandu, to nodoko modhier, nikech un, mondo un ubed jomwandu nikech dhierneno.

¹⁰Koro ma e pacha kuom wachni: Sani koro ber mondo utiek tich mane uchako higa mokalo. Un emane uchako tijni mokuongo, ok nukuongo chako choko kende, to nukuongo bedo gi dwaro mar chiwo giu bende. ¹¹Omiyo koro dhiuru nyime gi tijno nyaka utieke! Beduru gi ikruok mar tieke mana kaka nubedo gi chenro mar chake, to timuru kamano mana gi giu maun-go. ¹²Nikech un gidwaro mar chiwo, to Nyasaye biro rwako chiwono kaluwore gi gik maun-go munyal chiwo, to ok gik muongego.

¹³Dwarowa ok en mondo jomoko odong' gi ting' mayot to un wamiu ting' mapek, to dwarowa en ni ji duto ochiw maromre. ¹⁴To sani ma un-go mogundho biro konyo dwaro ma gin-go, mondo un bende achien ma gin-go mogudho biro konyo dwaro ma un-go. Kamano otimore to ubiro bedo gi konyruok maromre, ¹⁵mana kaka ondiki ni, "Ng'at mane ochoko mang'eny ne ok obedo gi mathoth ahinya kendo ng'at mane ochoko manok, ne ok obedo gi matin mohingo".

Oor Tito Korintho.

¹⁶Adwoko erokamano ni Nyasaye moseketo, e chuny Tito, dwaro mar konyou, mana kaka an bende an-go. ¹⁷Ne ok orwako mana kwayowa kende, to ne ochi-

wore kende en owuon mar konyou, mi koro ero obiro iru kuom dwarone owuon.

¹⁸To bende waoro owadwa moro kode, mong'ere e kanise duto ne tije mar Injili.

¹⁹To ok mano kende, kanise ne oyiere mondo odhi kodwa e wuodhwa mar tero chiwo. Tijno watimo mondo wami Ruoth owuon duong' kendo mondo ji ong'e ni waikore konyo. ²⁰Wadwaro mondo ji kik ne rach moro e yo mwatiye tij mich mar ng'wononi. ²¹Nikech watemo matek mondo watim maber, ok e wang' Ruoth kende, to e wang' dhano bende.

²²Jal machielo mwaoro kodgi en owadwa mwasetemo mwaneno ni en ng'ama ochiwore ni tije mangeny, to sani koro ochiwore moloyo nikech gen mogenou. ²³Tito to anyalo loso kuome kaka nyiwuodha kendo jatich mwatiyogo kaachiel e dieru, to jowetewa mamokogo to gin joma kanise Ooro, mondo omi Kristo duong. ²⁴Omiyo nyisuru jootewago ni un joma ohero ji, mondo kanise duto oyie ni sungawa kuomu ok en mar oyuma.

9 Onge tiende mondo andiknu kendo kuom kony monego oor ni joma ler, ²Ang'eyo ni uikoru konyo, kendo asesungou ni jo Makedonia, ka anyisogi ni owete man Akaya osebedo moikore konyo chakre higa mokalo kendo ramo maru osejiwo thothgi. ³Koro ee aoro owetegi mondo sungawa kuomu kuom wachni kik lokre mana weche manono; to mondo giyudu kuikoru mana kaka ne asewachonigi. ⁴Nono to, ka jo Makedoniagi obiro koda moyudo ka ok uikoru, wiwa dikuodi, (ka ok alose e wichkuot ma un bende duyudi) nikech geno maduong' mwaseketo kuomu. ⁵Kuom mano ne aneno ni ber mondo ajiw owetegi mondo olimu chon mondo utiek chenro duto mag chip ng'wono mane usesingoru mar chiwo. Kamano, ka abiro to anayud ka chiwo maru mar ng'wono oikore, kendo mano nonyis ni uchiwe gi ng'wono, to ok kuom achuna.

Chiwo Migolo Kuom Ng'wono.

⁶Paruru wachni: Ng'at mokomo kodhi manok kayo cham manok, to ng'at mokomo kothe mang'eny kayo cham mang'eny. ⁷Ng'ato ka ng'ato mondo ochiw kaka chunye oyiero, ma ok oywago ang'e, kata nikech ochune, nimar Nyasaye ohero ng'at ma chiwone ka mor. ⁸To Nyasaye nyalo miyo ubed gi gweh mogundho, mondo kinde duto ubed gi gik moko duto munyalo konyorugo un uwegi, kod mamako malang' munyalo konyogo jomamoko. ⁹Kaka ondiki ni,

"Ochiwo gige ni joma odhier gi ng'wono, ber mare osiko nyaka chieng'."

¹⁰Koro Jal machiwo kodhi ni jakomo, kendo mamiyo jachiemu makati biro chiwonu kendo medonu dimang'eny kodhi mikomo kendo obiro miyo timu makare medore. ¹¹Obiro miyo udok jomwandu e yore duto, mondo ubed mang'won kinde duto, kendo mondo ji mang'eny odwok erokamano ni Nyasaye kuom mich mane wateronigi koa kuomu.

¹²Nikech tich mutimoni ok chop mana dwaro jomaler kende, to bende omiyo ji dwoko erokamano ni Nyasaye nikech kony ma giyudo. ¹³Kuom nyiso ni uchung' kodwa e tijni, miyo Nyasaye duong' nikech mano nyiso ni umako chik mar Injili mwahulo, kuom ng'wono mane omiyo uyie pogo kodgi giu, kaachiel gi jomoko bende. ¹⁴Omiyo gibiro lamonu Nyasaye, ka chunyi otwere kodu, kuom ng'wono mogundho ma Nyasaye osemiyou. ¹⁵Wagouru erokamano ni Nyasaye kuom michne maduong' mokalo apimal

Paulo Osiro Tije Kaka Jaote

10 Koro an Paulo awuon akwayou kuom muolo kod ng'wono mar Kristo – ma ji wacho ni amuol ka also kodu wang' gi wang' to ni akwiny ka an mabor kodu! ²Asayou ni kik umi abi iru ka ager, kaka ajabedoga ni jomoko maparo ni wadak e pinyini kwaluwo dwaro jopiny.

³Nikech kata obedo ni wadak e pinyini, to ok wakedi kaka jopiny kedo. ⁴Nikech gilweny mwaledogo ok gin mag pinyini, to gin gilweny mager mag Nyasaye, mwakonyorego kuom muko kuonde mochiel motegno. ⁵Waketho mbekni kod riekni mag wuondruok duto mag sunga dhano, ma dino ni ji yor ng'eyo Nyasaye, kendo watweyo paro ka paro mobam, mi wami owinj Kristo. ⁶Adier, wabiro kumo kit ng'anju moro amora e dieru, nyaka chop un duto ubed joma obolore chuth.

⁷Ung'iyu gik moko mana mothanyore gi oko. Ka ng'ato ang'ata paro ni en ng'at Kristo, to kik gimoro wuonde ni en ng'at Kristo moloyowa! ⁸Nikech kata ka dipo ni asesungora mokalo kare kuom teko ma wan-go ma Ruoth osemiyouwa mar gerou, to ok mar kethou, to wiya ok kuodi kata matin. ⁹Ok adwar mondo anenra kagima abwogou gi barupena. ¹⁰Nikech jomoko kuomu wacho ni, "Barupege pek kendo kwiny, ka en kodwa e ringruok to onenore ng'ama yomyom, kendo koyalo to wechene onge tich." ¹¹Joma wuoyo kamano nyaka ng'e ni weche mwawachonu e barupewa mwandikonu ka waonge, ema bende watimo ka wan kodu.

¹²Chutho, ok dwahedhre mar ketore, kata pimore gi jogogo mating'ore malo, kaka joma lich mokalo. Joma kamago ofuwo, kuom pimore gi rapim magin giwegi ema giketo, kendo kuom ng'ado buchgi kendgi, kaka joma lich. ¹³Wan to ok dwasungre mokalo kiewo moketnwa, to wabiro keto sungawa kama onego ogikie, kaluwore gi kar tich ma Nyasaye osechanonwa, ma okwako nyaka koru kono. ¹⁴Omiyo ka wasungore ni tendwa okwako nyaka koru kono, to ok wakal tong'wa nikech wan emane wakuongo chopo iru gi Injili mar Kristo bang' wuotho wuoth marabora. ¹⁵To bende, ok dwasungre mokalo tong'wa kuom tich ma jomoko nono ema timo. To genowa en ni, kaka yie maru medo gerore, e kaka tong'wa mar Injili biro medo yarore, ¹⁶mondo eka wyal Injili e pinje mabor

moyombou. Nikech ok wadwar sungore kuom tich ma ng'at machielo ema otimo e kare mar tich. ¹⁷To "Ng'at madwaro sungore, mondo osungre kuom Ruoth." ¹⁸Nikech ng'at mapwoyore kende ok ema ji yiego, to mana ng'at ma Ruoth pwoyo.

Paulo Kod Jo-ote Mag Miriambo

11 Ageno ni ubiro bedo mang'won koda kuom fupa madundoni, ma bende usebedo ka uyiego. ²Nyiego omaka kodu machalo gi nyiek Nyasaye. Ne asingou ne dichwo achiel kende, ma en Kristo mondo omi achiwu kaka nyako masili ni en. ³To aluor ni dipo ka pachu okethore, mi uwe hera matut kendo maler muherogo Kristo, mana kaka Hawa ne thuol owuondo gi miriambone mariek. ⁴Nikech ka ng'ato obiro e dieru ka yalonu Yesu mopogore gi mano mane wayalonu, kendo kata uyudo Roho machielo gi mano mane uyudo, kendo uyie gi Injili moro amora mopogore gi mane uyudo, kendo uchikone itu gimor. ⁵To ok apar ni an piny ahinya molooyo "jooote" mamoko mukwano ni dongo malichigo! ⁶Nyalo bedo ni ok ang'ith e wuoyona, kata kamano, an gi ng'eyo kuom gik ma apuonjo. Wasebedo ka waleronu wechegi kinde ka kinde.

⁷Mitka ukwana jaketho nikech ne adwokora piny, mondo eka ating'u malo, kane ayalonu Injili mar Nyasaye maak adwaro chudo koa kuomu? ⁸Ne amayo kanise moko e yor yudo kony eka mondo atinu. ⁹Kendo kane atiyu e dieru, to ne ok amiyo ng'ato ang'ata ting' mapek e kinde mane an gi dwaro moro amora, nikech owete moa Makedonia nokelona gik moko duto mag konyruok. Asetemo matek mondo kik abednu misigo e yo moro amora, kendo pod abiro medo timo kamano. ¹⁰Chutho, ka pod adiera mar Kristo nikuoma, onge ng'ama biro chungo sunganani e gwenge mag Akaya. ¹¹Nang'o? Nikech ok aherou koso? Ngang'. Nyasaye ong'eyo ni aherou. ¹²To abiro dhi nyime katimo gima atimoni

mondo ageng' "jooote" mamoko masungore kendo wacho ni gitiyo tich machalre gi marwa. ¹³Josungago ok gin jooote madier. Gin jooote mag miriambo, kendo giriambo kuom tich magitimo, ka giketore mondo gichal gi jooote madier mag Kristo.

¹⁴To maak nyal kawowa gi wuoro nikech kata Satan bende wuondore koke-tore kaka malaika mar ler. ¹⁵Kuom mano wachni ok wendo kuomwa, ka jotich satan bende oriedo mondo okwan kaka jotich mag tim makare. To e giko gibiro yudo kum mowinjore gi timbegi.

Sunga Paulo E Chandruok

¹⁶Anuoyo: Kik ng'ato kawa ni afuwo. To ka uhero, to kawauru kaka ng'at mofuwo, mondo an bende asungrae matin. ¹⁷Gima koro adwaro wachoni ok Ruoth ema oyiena mondo awachi, to awache e yor fuwo. ¹⁸Nikech ji mathoth sungore kaka jopiny sungore, an bende weuru asungrae matin. ¹⁹Un uwegi ukaworu niuriek, to pod urwako joma ofuwo gi riekougo tee! ²⁰Chutho urwako koda ka joma lokou wasumbini mag-gi, kata ma kawo giu e yor mecho, kata ma gajou, kata ma tiyou githuon, kata ma diyoyu piny kendo thalo lembu! ²¹Ayie kawo wichkuot muketo kuomano; nikech wan ne ok wanyal timo gik majogo timo, nikech wanyap!

To ka ng'ato nyalo hedhore mar sungore kuom gimoro amora - awuoyo kaka ng'ama ofuwo - to an bende anyalo sungora mana kaka gin. ²²Di gibed jo Hibrania? An bende an. Di gibed jo Israel? An bende an. Digibed nyikwa Ibrahim? An bende an. ²³Di gibed jotich Kristo? (Ka awuoyo kama to achalo janeko) An awuon an jatich maber molooyo! Asetiyo matek molooyo; osetweya e od twech kinde mang'eny molooyo; oserodha gi del kinde mang'eny molooyo; kendo asebedo machiegni gi tho kinde mang'eny molooyo. ²⁴Jo-Yahudi ne ochwada del piero adek gochiko nyadibich.

²⁵Bende jo-rumi norodha nyadidek gi ludhe, kendo ne ochiela gi kite dichiel. Yie ne obarore koda e nam nyadidek, kendo chieng' moro ne ariyo e dier nam otieno kod odiechieng' ²⁶E wuodhega mathoth, aseneno masiche e aore mopong; asethagora e lwet jomecho, e dier jo Yahudi wetena kod joma ok jo-Yahudi. Masiche ne olwora e mier madongo, e thimbe, e ataro, kendo e dier 'Jowete' ma wuondore. ²⁷Asetiyo matek gi lwetena, kendo asechandora malit, ka afuwo nindo n dalo mang'eny. Kech osechama, kendo riyo oseloya; kinde mathoth asebedo ka aonge gi chiemo moromo, asewuotho duk. ²⁸To ewi mago duto, an gi ting' machielo modiya mar paro kuom kanise duto. ²⁹Ka ng'ato nyap, to donge an bende adoko manyap kode? Koso ka ng'ato odonjo e richo, to donge litna?

³⁰Ka ochuna ni nyaka asungra, to abiro sungora, kuom gik manyiso nyawona. ³¹Nyasaye ma Wuon Ruoth Yesu ma ipako nyaka chieng', ong'eyo ni ok ari-ambi. ³²Ka an Damaski, jatelo manie bwo ruoth Areta noketo jorit e ranga dala mar jo-Damaski mondo omaka. ³³To ne atony, kane oketa ei okapu, mi olora piny kakadho e otuchi manie kor ohinga.

Fweny Ma Paulo Noneno Kod Kudho Manie Ngimane

12 Nyaka asungra kata obedo ni sunga masungorago ok kony gimoro. To koro awuoyo kuom lek gi fweny mane Ruoth omiya. ²Ang'eyo ja Kristo moro mane oyudhi moter e polo mar adek, higni apar gang'wen mokalo (Akia kata notere kuno e ringruok kata nodhi gi chunye - Nyasaye ema ong'eyo) ³Kendo ang'eyo ni ng'atni kata e ringruok kata ok e ringrouk nodhiyo kuro, (ok ange'yo - Nyasaye ema ong'eyo) ⁴motere nyaka e paradiso. Kuno nowinjoe weche malich ma ok oyiene dhano losoe. ⁵Abiro mana sungora kuom ng'at machalo kamano, to ok anyal sungora kuoma awuon - makmana ka asungora kuom

gigo manyiso nyawona ⁶To kata ka daher mar sungora, to ok dikawa ni afuwo, nikech gik ma dimi asungra gin adier. To ok abi sungora, nikech ok adwar ni ng'ato okawa ni an ng'ama lich moloyo gik mosene ka atimo, kendo mosewinj ka awacho.

⁷To mondo geng'a kik asungra kuom gik malich miwuoro mane aneno e fweny, ne omiya kudho machwoyo ringra. Kudhono ne en jaote mar Satan, ma noor mondo osanda eka otama kik asungra. ⁸Ne alamo Ruoth nyadidek kuom wachni, ka asaye mondo ogolna kudhono; ⁹to ne odwoka ni, "Ng'wonona mamiyi oromi, nikech kama nyawo nitie ema tekona tiyoe moloyo" Emomiyo, abiro medo sungora gi ilo kuom nyawoga, mondo eka teko mar Kristo osik kuoma. ¹⁰Mano omiyo nikech Kristo awinjo maber e nyawo maga, kata ayany, kata chandruok, kata sand, kata midhiero, nikech ka anyap koreka atek.

Gima Paulo Paro Kuom Jo-Korintho

¹¹Un ema umiyo atimora kaka ng'ama ofuwo. To joma onego opwoya gin un, nikech kata ka achalo ng'ama nono kamano, to 'jooote' mudhialo ni lichgo ok oloya kata matin. ¹²Gik manyiso ni ng'ato jaote mar adier, magin ranyisi gi honni kod gik madongo-dongo miwuoro, ne atimo e dieru ka ahora mos ahinya. ¹³En ang'o mane atimo ni kanisa mamoko ma un ne ok atimonu, makmana ni un ne ok amiyoyu ting' mapek mar konya? Kapo mano ne rachnu to mondo uwena!

¹⁴Koro aikora biro limou e limbena mar adek. Ka abiro to ok abi miyoyu ting' mapek, nikech un ema adwarou, to ok gigeu. Mano en gima ong'ere, nikech nyithindo ok ema onego okan mwandu ni jonyuolgi, to jonyuol ema onego oken ni nyithindgi. ¹⁵Emomiyo aikora mar miyoyu gik moko duto ma an go, koda ka ngimana bende, mondo eka akonyu. Ka an aherou malach kamano, koro un onego uhera matin adier? ¹⁶Koro unyalo yie

koda nine ok abedonu ting' mapek. To pod unyalo wacho ni ne akonyora gi rieka maricho mondo amau ling'ling'. ¹⁷To be dine amayoue giru moro kuom joma ne aoro iru? ¹⁸Ne ajiwo Tito mondo obi iru, kendo ne aoro owadwa machielo mondo obi kode. Mitki Tito owuon nomayou giu? Donge en kod an ne watiyo e dieru ka wan gi chuny machalre kendo ka waluwo yo machalre?

¹⁹Samoro nyalo bet ni uparo ni wate-mo pwoyorenu kuom wuoyonu kama. Ngang! Wawuoyo e nyim Nyasaye mana kaka jo Kristo. Osiepewa mwageno, ng'euru ni gik moko duto mwatimo wati-mo mondo wageru. ²⁰Aluor ni ka abiro iru kuno to anyalo yudou ka ok uchal kaka adwaro ni uchal, kendo un bende unyalo yudo ka apogora gi kaka udwaro ni abedi. Aluor ni anyalo yudo ka nitie dhawo gi nyiego, gi mirima, gi ichlit, gi ajara, gi kuoth, gi sunga kod koko e dieru. ²¹Aluor bende ni ka achako alimou kendo to timbeu nyalo miyo Nyasacha kuod wiya e nyimu, mi aywagi nikech ji mathoth kuomu osetimo richo kendo pok olokore oweyo dwanyruok, terruok kod anjawa magisetimo.

Siem Mogik

13 Ma koro dhi bedo limbena mar adek malimo ugo. To mana kaka Ndiko wacho, "Adiera mar wach nyaka losi e nyim joneno ariyo kata adek." ²Kaka ne asiemou e limbena mar ariyo, e kaka amedo siemou sani ka aonge kodu ni ka abiro to ok nawe mak akumo jogo mane otimo richo motelo kod joricho mamoko duto ³nikech uwacho ni udwaro

mondo ubed gi ratiro ka Kristo ema miya teko mar wuoyo adier. En ok onyap kotiyu kodu, to otiyo gi teko e dieru. ⁴Nikech, kuom adier, ne oyie doko manyap kane igure, to koro ongima kuom teko Nyasaye. Mano e kaka wan bende wanyap ka wan kuome, to kuom teko Nyasaye wan roteke kwatiyo kodu.

⁵Nonreuru mondo une ane ka bende un gi yie. Adier, temreuru ane! Be un gi ratiro adier ni Kristo nie iu, makmana ka userem chuth? ⁶Ageno ni ubiro yudo ni pok warem e penj. ⁷Koro walamo Nyasaye ni ok ubi timo gimoro amora marach, ok mondo eka ji onewa kaka joma oselochi, to mondo un utim timbe mabeyo, kata kapo ni wanto wanenorenu kaka joma oserem. ⁸Nikech ok wanyal timo gimoro amora makedo gi adiera, to mana ma adiera. ⁹Nikech wan wamor ka wanyap, to un utek. Omiyo walamonu mondo udok malong'o chuth. ¹⁰Ma e gima omiyo andikonu gigi ka aonge kodu, mondo ka achopo iru to kik akonyra gi gero etekona - teko ma Ruoth omiya en mar gerou to ok mar kethou.

Mos Mogik

¹¹Koro mogik Jowetena, oritiuru, losuru yoreu mobam, winjuru wechena, beduru gi winjruok e kindu, kendo daguru gi kuwe. Eka Nyasach hera kod kuwe nobed kodu.

¹²Mosreuru un duto ng'ato gi ng'ato gi yogruok maler. ¹³Joma ler duto omosou.

¹⁴Mad ng'wono mar Ruoth Yesu Kristo, gi hera mar Nyasaye, gi lalruok mar Roho Maler obed kodu un duto.